

Na osnovu Statuta Visoke škole za savremeno poslovanje, informacione tehnologije i tržišne komunikacije „Internacionalna poslovno – informaciona akademija“ Tuzla, Senat Visoke škole za savremeno poslovanje, informacione tehnologije i tržišne komunikacije "Internacionalna poslovno-informaciona akademija" Tuzla donosi:

PRAVILNIK O PRIZNAVANJU POLOŽENIH ISPITA (prečišćeni tekst)

Član 1

Ovim Pravilnikom utvrđuje se provođenje postupka priznavanja, djelimičnog priznavanja ili nepriznavanja položenih ispita studentima sa drugih visokoškolskih ustanova koji prelaze na Visoku školu za savremeno poslovanje, informacione tehnologije i tržišne komunikacije „Internacionalna poslovno – informaciona akademija“ Tuzla (u daljem tekstu: IPI Akademija), odnosno studentima IPI Akademije koji promijene studijski program, ili se nakon što izgube status studenta ponovo upišu na neki od studijskih programa na IPI Akademiji.

Član 2

Pisani zahtjev za priznavanje položenih ispita student podnosi studentskoj službi IPI Akademije.

Krajnji datum za podnošenje zahtjeva za priznavanje položenih ispita je do početka ovjere zimskog semestra u akademskoj godini u kojoj je student/ica upisao IPI Akademiju na nekom od studijskih programa.

Zahtjev za priznavanje položenog ispita sadrži:

- 1) Ispunjen obrazac zahtjeva.
- 2) Originalnu potvrdu (ispis ocjena) o položenim ispitima na drugoj visokoškolskoj instituciji ili IPI Akademiji
- 3) Ovjereni nastavni plan i program predmeta (silabus) položenog na drugoj visokoškolskoj ustanovi (ne dostavljaju studenti koji su položili predmete na IPI Akademiji).

Član 3

Direktor IPI Akademije nakon podnesenog zahtjeva imenuje Komisiju za priznavanje prethodno položenih ispita (u daljem tekstu: Komisija).

Broj i sastav članova Komisije određuje direktor IPI Akademije u zavisnosti od broja predmeta za koje se provodi postupak priznavanja i ekvivalencije, odnosno pripadnosti predmeta utvrđenim naučnim/umjetničkim oblastima.

Komisija broj najmanje tri člana, a obavezno u sastav Komisije ulaze predmetni nastavnici iz predmeta za koje se traži priznanje, ukoliko predmetni nastavnik nije u mogućnosti da bude član Komisije u sastav Komisije obavezno ulazi nastavnik sa studijskog programa koji je student upisao.

Članovi Komisije su u pravilu članovi akademskog osoblja IPI Akademije koji imaju rješenja o izboru u nastavno zvanje.

Član 4

Priznaju se samo ispiti koji su položeni na visokoškolskim institucijama, u slučaju prepisa s drugog fakulteta ili u slučaju mobilnosti studenata, te predmeti položeni na IPI Akademiji u slučaju promjene studijskog programa ili ponovnog upisa.

Priznavanjem ispita priznaje se i ocjena s kojom je student ocijenjen na ispitu.

Da bi ispit položen na drugoj visokoškolskoj ustanovi bio u cijelosti priznat kao obavezni predmet za odgovarajući studijski program an IPI Akademiji, pored odgovarajućeg sadržaja, predmet mora imati najmanje isti broj ECTS studijskih bodova, kao i ekvivalentan obavezni predmet na IPI Akademiji.

Predmet položen na drugoj visokoškolskoj ustanovi ili IPI Akademiji, a ekvivalentan je po sadržaju i broju ECTS studijskih bodova obaveznom predmetu na nekom drugom studijskom programu na IPI Akademiji, a nije obavezan na studijskom programu koji student pohađa, priznaje se u nazivu kao predmet na IPI Akademiji i tretira se kao izborni predmet.

Predmeti položeni na drugim visokoškolskim ustanovama koji ne postoje na studijskim programima na IPI Akademiji, a srodni su užim naučnim oblastima na studijskim programima na IPI Akademiji, mogu se takođe priznati kao izborni predmeti pri čemu se priznaju sa originalnim brojem ECTS studijskih bodova vodeći računa da ukupan broj ECTS studijskih bodova u jednom semestru ne može biti manji od 30.

Za predmete koji nemaju iskazane ECTS studijske bodove u postupku priznavanja se analizira sadržaj predmeta i ukupan broj časova (ukoliko postoji) predavanja na tom predmetu. Taj broj mora biti najmanje jednak broju časova predavanja ekvivalentnog obaveznog ili izbornog predmeta na IPI Akademiji. U tom slučaju se broj ECTS kredita priznatog ispita utvrđuje u skladu sa nastavnim planom i programom IPI Akademije i u skladu sa pravilima ECTS sistema.

Predmeti položeni na IPI Akademiji se priznaju po automatizmu kao obavezni ili izborni, u skladu sa Nastavnim planom i programom i ako su položeni po važećem Nastavnom planu i programu na način propisan stavovima 3,4,5 ovog člana.

Ukoliko su predmeti položeni na IPI Akademiji po Nastavnom planu i programu koji nije u primjeni postupak priznavanja ispita se provodi kao i u slučaju priznavanja ispita sa drugih visokoškolskih ustanova, bez obaveze dostavljanja ovjerenog nastavnog plana i programa predmeta (silabusa) položenog predmeta.

Član 5

U postupku priznavanja ispita Komisija sastavlja Izvještaj. Izvještaj sadrži prijedlog o priznanju, djelimičnom priznanju ili nepriznanju položenih ispita.

Izvještaj se dostavlja Senatu IPI Akademije.

Član 6

Po prijemu Izvještaja iz prethodno člana, Senat IPI Akademije na svojoj sjednici razmatra Izvještaj, odlučuje o istom i svoju Odluku, zajedno sa Izvještajem, dostavlja direktoru IPI Akademije, koji donosi odgovarajuće Rješenje.

Rješenje direktora IPI Akademije, sadrži sljedeće elemente:

1. Naziv predmeta i broj ECTS studijskih bodova sa druge visokoškolske ustanove koji je predmet priznavanja,
2. Naziv predmeta i broj ECTS studijskih bodova na IPI Akademiji koji su ekvivalentni predmetu koji se priznaje,
3. Naziv predmeta koji su djelimično priznati, sadržaj i obim priznatog dijela ispita, kao i preostale obaveze studenta, rokovi i način polaganja preostalog dijela ispita i ocjenjivanje cijelog ispita.

Član 7

Na osnovu Rješenja kojim je u cijelosti priznat položeni ispit kao obavezni ili izborni (u slučaju da takav postoji na drugim studijskim programima na IPI Akademiji) u indeks studenta se upisuje ISPIT PRIZNAT, upisuje naziv predmeta i broj ECTS studijskih bodova kako stoji u studijskim

programima na IPI Akademiji i prepisuje ocjena ostvarena na drugoj visokoškolskoj ustanovi koju ovjerava predmetni nastavnik.

U slučaju da se radi o predmetima sa drugih visokoškolskih ustanova ili IPI Akademije, a koji ne postoje na IPI Akademiji po važećem Nastavnom planu i programu, a mogu biti priznati kao izborni, u indeks studenta se upisuje ISPIT PRIZNAT, originalni naziv predmeta, originalni broj ECTS studijskih bodova koje nosi taj predmet te ocjena ostvarena na drugoj visokoškolskoj ustanovi koju ovjerava direktor IPI Akademije.

Ukupan broj ECTS studijskih bodova u jednom semestru ne može biti manji od 30.

Kod djelimično priznatih ispita, kada student u cijelosti polozeni ispit, predmetni nastavnik upisuje ocjenu u indeks studenta.

Član 8

Pitanja koja nisu regulisana ovim Pravilnikom rješava Komisija za priznavanje ispita.

Član 9

Ovaj Pravilnik stupa na snagu danom donošenja.

Prečišćeni tekst Pravilnika o Priznavanju položenih ispita sadrži: Pravilnik o priznavanju položenih ispita broj 32/2014 od 09.10.2014. godine te Dopunjeni Pravilnik o priznavanju ispita broj 01/2021 od 13.01.2021. godine u kojima je naznačen dan stupanja na snagu i početak primjene.

Tuzla, 13.01.2021.godine